

èxtra

ARUBA

FRANKLIN GRANADILLO CU PROYECTO GRANDI DI "BIG BAND" PA ARUBA

ORANJESTAD (APA)
Franklin Granadillo, director
di orquesta, compositor y

arreglista, tin pensa di forma
permanentemente un "Big
Band" di Aruba durante aña

1991.

"Mi kier bai forma un Big
Band di Aruba. Un cu lo por

funciona como un proyect
band," Granadillo a bisa.

Franklin Granadillo a
sigui bisa cu esaki lo duna
oportunidad na arreglistanan
cu tin e conocimiento y cu
kier orchestra mas cu un
"small band."

"E ta un bon manera,
enbez di purba haña e
musiconan pa bin les cual ta
difícil, pa integra nan den un
banda asina y indirectamente
bo ta pusha nan den e
direccion di educa nan mes y
siña mas ariba e tereno
musical," Granadillo a trese
dilanti.

Franklin Granadillo
proximo aña lo purba realisa
locual semper tabata su
soño, pero pa motibo di hopi
compromiso cu otro
hendenan nunca e por a
realisè. Ta trata di un disco
L.P. propio. Granadillo a
bisa cu e lo invita algun
artistanan local pa canta
ariba su disco, pero mayoria
di e cancionnan lo ta
instrumental, den cualnan e
lo toca su trompet.

Mescos ta e caso cu
Claudius Phillips, Granadillo
lo programa su mes mayoria
di e contenido di su L.P.
Sinembargo, Granadillo lo
usa "live musicians"
camindanan cu e ta haña ta
necesario. "Tin cosnan cu bo
no por pone riba computer,"
Granadillo a bisa.

Un di e proyectonan cu
Franklin Granadillo kier
realisa otro aña ta
continuacion di su
estudionan den musicologia
na Hulanda. Granadillo lo
especialisa den esaki. Si
esaki tuma lugar tur e otro
proyectonan lo mester warda
atrobe ya cu su estudio lo
tumé cuatro aña.

Sinembargo Granadillo a
bisa cu e proyecto di e "Big
Band" lo continua apesar di
tur cos. "Si esey ta e caso lo
mi establece e Big Band
prome cu mi bai," Granadillo
a bisa.

Si Granadillo no bai
Hulanda e lo concentra ariba
enseñanza. Manera conosi
durante e aña aki Franklin
Granadillo a termina su
P.D.G. y awor e por duna les
na schoolnan secundario y
mas halto.

Pa loke trata otro
proyectonan cu Granadillo ta
haciendo, e ta dunando les
na un school na San
Nicolaas. E lo duna les na
mas schoolnan na Aruba.
Tambe e tin un curso di
arreglo na Academia Musical
na Aruba, cu posiblemente lo
ser expandé. Tambe e lo bai
duna otro tipo di cursonan.

Pa loke ta trata aña 1990,
Granadillo ta kere cu tabata
tin masha hopi produccion
durante e ultimo parti di aña.
"Mi kier sa cu e aña aki mi a
scucha mas produccion cu
nunca na radio," Granadillo a
bisa.

Musicalmente Granadillo
a bisa cu e la ripara cu nos
musiconan ta concentra mas
awor ariba calidad.
"Musiconan, especialmente
gruponan ta cuminsa pone
importancia, atencion ariba
nan produccionnan cu miras
pa por mehora nan mes pa
eventualmente yega na
produccionnan
internacional."

Granadillo a bisa cu e ta
na altura cu por ehempel The
Arubian Band ya a firma
contrato cu Gerry Jimenes,
un productor internacional,
pa internacionalisa e banda.

Granadillo ta un
consultant musical pa The
Arubian Band.

E mensahe cu Franklin
Granadillo tabata tin pa
musiconan Arubano tabata,
pa trata di ta conciente di e
importancia di un forma di
cooperacion.

"Ta importante un forma
di union entre e musiconan,
sea den un asociacion ó
organizacion. Mi ta kere cu
banda di otro ta difícil pa
musiconan funciona, pero
den cooperacion tur cos ta
posibel. Especialmente si
considera con chiquito Aruba
ta," Granadillo a bisa.

E la sigui bisa cu nos
musiconan mester trata di
duna nan maximo sosten y
aporte na desarrollo di nos
aspecto cultural musical.

"Hopi biaha nos no ta
conciente cu un tiki cu cada
un aporta por yuda na
desarrollo di nos país y
especialmente nos cultutra,"
Franklin Granadillo a finaliza
bisando.